

Cu paso firme padilanti minister Dowers lo ehecuta su plan di maneho 2013-2017

ORANJESTAD - Dia 15 di januari 2014 a toca minister Dowers e turno pa duna un presentacion na prensa di su maneho pa e temporada di gobernacion di Gabinete Eman II. Minister di husticia a inicia su presentacion gradiciendo tur departamento cu a contribui na e bienestar di nos comunidad durante e ultimo 4 añanan. Particularmente a gradici departamento y directivanan di enseñansa cu tabata parti di su ministerio. A pone enfasis riba e hecho cu posibilidad di exito riba tereno di seguridad y prevencion di crimen ta bira mucho mas grandi si gremio y comunidad traha hunto cu gobierno. Seguridad di nos pais ta un responsabilidad di nos tur. Minister Dowers a duna un relato di su maneho di e ultimo 4 año y tur su logronan. Tambe tur presente a haya copia di un reporte cu ministerio a traha di su maneho durante di e periodo 2009 pa 2013. E vision di e minister di husticia ta haya su origen den obhetivo nan cu gabinete Mike Eman tin pa nos pais. Ta evidente cu gobierno ta trahando duro na construi y mantene un Aruba dushi, prospero cu ta un paraiso pa biba y traha. E vision hudicial ta pa mantene un aparato hudicial integral, na unda gobierno hunto cu comunidad ta para responsable pa seguridad di nos pais. Mision di e minister ta pa tin un desaroyo continuo di e

sistema legal y estado di derecho pa mantene orden publico y pa garantisa e seguridad di e derecho fundamental di nos comunidad. Maneho hudicial a cuminsa duna su resultado. Durante e prome lunanan di año 2013 entrada di boet a subi cu un miyon si compara esaki cu e año anterior. Esaki ta resultado di control di trafico mas severo cu tin como meta pa conscientisa nos ciudadanonan riba e importancia pa cumpli cu reglanan di trafico. Parlamento di Aruba a trata e codigo penal nobo, y pronto nos ta drenta den e fase di implementacion. Implementacion di e elementonan nobo di e ley aki seguramente ta bay tin su efecto riba e actonan criminal y atraconan cu ta tumando luga. Minister di husticia ta orguyoso di accentua e hecho cu funcionamiento di hopi departamento a wordo optimalisa, specialmente esun di cuerpo policial. Otro dos faceta cu a wordo subraya durante di e presentacion tabata e parti organisatorio, estructura di e cuerpo y posicion huridico di e agentenan. No mester lubida e inversion den ekipo cu cuerpo policial a haya. Ta un hecho cu e accidentenan cu consecuencia fatal a baha durante 2013 y ta intencion pa pone mas polis riba caya pa tin un control mas severo en bista cu Aruba ta conta awo cu mas di 70.000 auto riba su careteranan. No tin mucho movilidad den

trafico y ultimamente e uzo di celular tanten ta core auto a aumenta e cantidad di accidentenan den trafico. Aparte di esey e uzo di velocidad halto y uzo di alcohol ta keda factornan cu ta contribui na accidentenan den trafico. E servicio medico y di dentista pa e presonan di nos instituto coreccional KIA a wordo optimalisa. Riba e aspecto di seguridad a wordo subraya cu e uzo di cachonan special pa facilita trabao di e cuidadonan di prizon a duna un resultado hopi positivo. Minister di husticia a informa medianan cu su ministerio ta trahando riba un plan pa construi un edificio nobo pa e instituto. Minister Dowers a elabora riba varios tema di importancia riba tereno di seguridad. Su ministerio ta consciente cu tin un problema grandi cu residencianan familiar cu fungi como centro pa bende droga. Polis tin experiencia caba cu ta detene esun cu ta bende droga, pero otronan den e cas ta tuma e benta over. Minister di husticia ta determina na introduci un ley cu ta duna e posibilidad extremo di kita e cas di doño pa e motibonan menciona aki riba. Hubentud di awendia no a wordo lanta cu e norma y balornan di antes. Reclasering y Voogdijraad tin e mesun rol grandi den nos comunidad y ta esey Minister Dowers kier bisa ora e ta papia di un plan integral. Formacion di gang a baha pero

tin indicacion cu e hobennan aki ta esunnan cu ta bira e criminalnan di awendia. Gobierno di Aruba ta consciente cu tin un aumento di hortamento di auto. P'esey a institui un departamento nobo pa controla esaki. E desaroyo ta cu e crimen aki ta sosode na un forma bastante organisa. Tin varios garashi di auto chikito conoci como garashinan bao di palo, cu ta participa na e acto criminal aki. Den

e periodo aki nos ta bay traha duro na un cuadro legal na unda por ehempel garashinan mester ta registra. Locual ta interesante ta cu e hobennan ta wordo involvi den e negoshi aki. Minister Dowers a presenta algun obhetivo concreto cu e tin pa e periodo nos dilanti. Durante di siman su ministerio lo duna relato na publico general di e obhetivo nan aki. □